

國朝畿輔詩傳卷十六

長洲陶

樸鼻薌輯

錢塘吳長卿更生校

喬鉢

鉢字文衣內邱人明貢生

國朝歷官四川劍

州知州有文衣詩集

申涵光序文衣詩橫臆而出肝膽外露摧堅洞  
隙一息千里燕趙人多沈毅英爽無夸毗之習

文衣其  
尤著哉

王士正望劍州懷喬文衣詩次公狂自好名字  
滿人間才士無高位吟魂寄百蠻音書湖口縣

生死劍門關太息青  
蠅弔交州幾歲還

魏象樞東喬文衣詩數年驚宦海無日不高吟  
冰雪幽人氣琴書俠士心世情添白髮交誼冷

黃金留客坐山  
月牀頭話古今

靜觀

嗒然斗室間萬物胡爲者擾擾隙中駒我亦分野馬鍊  
氣歸丹元性命豈云假六經聖賢勞天地已傳舍何如  
瓶中花開落皆瀟灑裊裊青天雲秋風未可寫

別丁野鶴

誰不甘淪擲幽懷定幾人一尊憐海嶽孤劍惜風塵蹤  
蹟如吾放肝腸到爾真莫因潦倒甚容易百年身

宿寒亭驛

古驛重門花寂寂枯槐敗砌掩荒雲當年夜哭人何處

細雨蕭蕭不可聞

探梅

散吏風騷步探梅一樽獨醉古牆隈淋漓日落不歸去  
只等林梢月上來

米壽都

壽都字吉土宛平人明貢生 國朝官江蘇沈

陽縣知縣有吉土詩集

王崇簡序吉土韶齡英穎傳其家學揮毫落紙  
所謂高山欄其蒼佩華纓有廊廟之容焉既而  
海內多故歌板蕩傷大東歛歛感慨之音作矣  
迄於今悲激淒閔纏綿引抑亦其發於情之不  
得已乎

紅豆樹館詩話吉士為明太僕仲詔先生子少與王敬哉宗伯崔青蚓文學交好以詩文書畫相往還甲申後就邑令未幾鬱鬱卒而太僕所為勺園者在海淀之北其翠葆榭林於澁諸勝遂埋沒於烟橫草蔓中當太僕在時嘗繪園中景為燈都下號曰米家燈題詠成帙自林亭荒廢二百年來幾無人能指其遺址曩昔游觀觴詠之盛僅散見於池北偶談日下舊聞諸書亦徵文獻者所當知也

寄答喬百一

同懷貧賤意敝褐頗衣寒我賦無家別君歌行路難黃  
花高士似癡癡古人餐寂寞衡門下琴書與莫闌

宋轅文詢西山之勝口占答之

但隨流水去堤上盡長楊寺古垂丹碧山深倍鬱蒼  
鳥

馴窺客下僧老灌花忙信宿來青閣悠然夢自香

冀州河漲紀事

積潦崩長堰河流汜濫來空傳賈讓策莫覓李冰才舟楫人爭羨桑田客浪猜那堪風雨夕更聽澤鴻哀

六月百川騰秋禾未盡登蛟龍真跋扈風雨日憑陵何計全荒政懷憂問庶徵誰將下民苦一叫九閭應

馬之驢

之驢字口徠雄縣人順治間貢生官山東壽張縣主簿有口徠詩集

申涵光序馬子口徠以詩著制行醇謹所著養正諸書皆理學篤論而詩格大雅卓然成家

漁洋詩話近日下僚中往往多文士江都主簿馬之驩撰詩仿後補壽張簿又撰張秋志能詩子禮之每詫人曰吾以屈宋作衙官矣

抱關擊柝中莫謂無人人自不知耳

紅豆樹館詩話袁佑雪軒集有贈壽張主簿馬

口徠二律云春風雁過信陵臺猶憶談經絳帳

開白雪常從詩裏和清宵數向夢中來官閒暫

對桃花水吏隱惟傾竹葉杯見說上林新有賦

漢家原重馬卿才中原處處有詩名人到南樓

一聞聲三仕君猶為下吏十年我已厭諸生詞

壞葉鼓燕山冷運道帆檣濟水清咄咄書空應

自怪帝鄉千里暮雲橫觀三仕句疑口徠為學

博時曾望史議其後以

縣佐從事於河渠也

### 奉和徵君孫鍾元先生自蘇門過元城見贈

久企孫登隱初瞻郭泰過嘯崖清韻遠掃館素風多易

世憑垂訓忘年許和歌塵羈終欲脫奉席考槃阿

過揚子江宿玉山寺示僧達已

帶雨開江路隨風攷石扉  
佛慈容脫帽僧小倩更衣霧  
影歸還細潮聲入漸稀  
浮生閒半日清茗話依依  
客枕五更盡禪龕四壁空  
夢歸天界外身在佛聲中山  
靜自移月江平不動風  
遲明理舟楫前路指飛鴻

丙申自元城諭量移廣平授

一檄風催不可留  
五年雲散舊交遊  
半餘姓氏存詩卷  
無復歡呼動酒籌  
漫叟那能忘讓里  
閩仙却欲望并州  
露華未重蒹葭短  
已覺相思到水頭

盼柯園晤石耳山人

勞生誰復澹風塵石耳山人道意真粟里曾稱晉處士  
壘山原是宋遺民清餘積雪蕭蕭髮危挺孤崑落落身  
莫訝武陵非隔世桃花流水自通秦

漫興

莊子危言屈子騷笑啼聊用慰吾勞星躔步驟方和阮  
項領兒童且自驕短簿反加長簿上河曹難效馬曹高  
愁來看劍杯從引不厭頻持八月螯

新城弔古

唐皇垂老釀兵爭烽燧先從此地生見素讜言還切直  
九齡先識早分明范陽節度兼三鎮河北沈淪徧百城



獨有常山顏太守祇今舌在氣崢嶸

紫廷上壽正依依公主難留驟欲歸晉地據形資已借  
天平移鎮策原非萬千駝背金南括十六燕雲雁北飛  
容易流光四百載山河依舊冷斜暉

廣平別友

兩易春衣共薜蘿乍臨風柳聽驪歌懸知別後清宵夢  
只向邯鄲道上過

揚舫館詩

秦鹿成禽漢籙膺當塗典午遞衰興漁郎曾向春流見  
依舊桃花笑武陵

劉佑

佑字雲麓曲周人順治間貢生官山東高唐州

知州有尋遠樓詩集

曲周縣志佑司空榮嗣孫頴悟工詩以拔貢令  
斷水時大亂初平有悍民范黍伯者率眾不法  
當事欲勦以為功力爭之罷勦議撫全活無算  
擢知秦州民以舊逋繫獄者數百家具揭撫軍  
盡釋之嗣以公事免再起高唐州適三逆皆叛  
高唐居上游大軍絡繹悉力支拄不忍絲毫為  
累民

歸臥荒園張子常趙秋水枉顧答贈

吳楚十年別蹉跎秋復春歸依城郭舊客訝鬢霜新滄  
落悲游子饑寒迫老親君來沽濁酒蕭索負佳辰

霍亮雅路培生唐士彥同集小齋

非敢耽高尚家園喜暫歸  
深談午夜靜憶別十年違  
今昔疑殘夢行藏淡落暉  
柴門松月好相伴老漁磯

閻古古過高唐依韻奉贈

漚倒魚邱長開筵接故人  
風霜應久歷燈火暫相親  
窗白能留月談空不貯塵  
雲龍山色好何日許爲鄰

魚邱雨中卽事

朝來烟霧隱千峯萬頃波光  
雨後濃苔繡雲根閒著屐  
水流花榭一扶筇酒杯詩卷  
閒中趣樵斧漁簑畫裏容  
忽報兒童傳異事路傍雷火  
劈枯松

弔路皓月先生

夢魂久不到園林豈意雙魚卽訃音  
一代孤忠隨碧草千秋熱血灑青岑  
星驚樞馬當年事龍臥荒原此日心  
蹈海祇期完素志松楸應已愧華簪

九日同劉津逮夜集南園分韻

天空雁冷菊初黃有約尋詩過草堂  
邱壑喜能增韻事琴尊應不負秋光  
風吹短髮紛如雪月下疎簾皎似霜  
醉憶滄陽河畔柳闌珊清夢鎖漁牀

登叢臺

突兀荒岡徧草萊行人猶爲武靈哀  
金輿翠輦歸何處

山色河聲依舊來龍戰幾年驚趙壁馬嘶此日繞叢臺  
休悲探穀沙邱事挾瑟憑高醉不回

楊遺白

遺白字清源一字卿頊磁州人順治間貢生官

河南內黃縣知縣有舟瓠齋集

內黃縣志公明達有吏才政尚

寬平未幾謝去士民思之立碑

楊方晁傳公性倜儻飲酒可一石為諸生時家

徒四壁歌聲山金石及遷內黃令左右胥隸皆

綠林公攝以威威以德畏若神明告歸作鷺

鷺樓於南郭別墅以詩酒抒興者垂二十年

漁父詞

掛網長林理舊蓑鷺鷥飛下浴晴波清風六月涼如水

未識人間暑氣多

搔首前溪倦曲肱溪流不改舊時澄  
桃花夾岸紅如染  
春色依稀似武陵

毀國璘

國璘字褐襲內邱人順治間貢生官湖北襄陽

府通判

詠且停山石人

何年借豹隱獨立向高岑  
平覽諸峯秀遙臨衆壑深  
朝霞明素佩夕月散幽襟  
藍藍丹霄外空山自古今

魏體仁

體仁字仲一號筠圃南樂人順治間貢生官永

清縣訓導有一枝堂詩集客吟續稿

南樂縣志體仁少聰穎過目不忘爲文超渾工  
松雪書法尤長於詩雖相國孫無統袴習性孝  
友和易母谷氏病十三年日侍湯藥未嘗解衣  
受叔父桓撫養及長家值萬金任其出售無怨  
言姪弟或不率從  
容訓飭人自化之

### 積陰書懷

孤琴獨抱楚淮湄蓬轉離蹤閱歲時寥落寒雲帆影亂  
淒清涼雨雁行遲管絃永夜偏驚耳兒女芳辰最繫思  
蕭瑟平生同庾信江關詞賦鬢如絲

### 抵嘉陽

策馬春風入漢嘉山城曲抱水流斜子雲亭古餘芳草  
孫氏臺空弔落花十里桑田藏竹戶幾行柳市帶漁家  
車停昨夜飛新雨洗出峨眉一帶霞

### 馬鴻勳

鴻勳字雁楚號醉庵靈壽人順治間貢生有醉

### 庵草初集

周卜輔序雁楚日與麴生爲伍胸中塊壘勃勃  
難遏則以酒澆之至澆之不得然後發爲詩歌  
其辭饒剛強之  
氣鮮刻削之態

### 獨酌

落葉下平林秋風院宇深臺高先見月夜靜遠聞砧



冕十年志尊鱸萬里心何如頻酌酒莫負醉中吟

早秋卽事

無端驚午夢簾外亂鳴蟬况以窮愁日當茲寂寞天微  
風彫露葉細雨溼苔錢已有石林託無勞俗事牽

夏霽招友人

雨過柴扉掩呼童檢帙書愁中詩易廢病後酒難疎  
枕茗閒能煮畦花懶未鋤閒來勞屐齒相與醉吾廬

早發宜陵縣

長途勞客夢旅館候鳴雞鼓角臨關壯星河傍曙低  
漁燈依水見堤柳入烟迷不計程多少惟聞倦馬嘶

清明

依依楊柳近清明  
禁火初烟雨乍晴  
芳草侵堤時過馬  
梨花滿樹不聞鶯  
雲封翠壁平分岫  
鳥帶斜陽半入城  
把酒莫辜風日好  
遠林愁聽杜鵑聲

登獨山望石嘴舊居山人送酒飲溪上

夢中常憶舊山居  
此地重遊廿載餘  
華髮漸驚秋鬢改  
青山應笑故人疎  
巖花媚客浮村酒  
鄰叟留人摘野蔬  
別後與君應有約  
相將溪畔結茅廬

靈巖寺

山迴古寺遮葉落  
迷霜徑日暮老僧歸  
隔林聞遠磬

土門曹氏園亭

竹影半灣和露瘦松陰幾曲帶雲肥主人無酒堪留客

早向斜陽策馬歸

黃蒞若

蒞若字石筍元城人貢生有留笏草堂集一卷

部煥元序石筍先生爲先朝相子汲古好學博極羣籍刻意爲詩雄深雅健不落大歷以後吾鄉稱詩者咸以爲首焉今令子志伊兄弟並貴而布衣芒屨不異寒素常手錄先儒格言躬自踐履

百家詩鈔留笏草堂爲少師中五公所遺在元城之西石筍讀書其中以花鳥自娛故其詩多悠然有會

登東昌光岳樓

層樓丹楹倚雲端勢壓青齊自大觀海上雲山爭入座  
天涯詞客各憑欄城銜晚照征帆近木落霜空去雁寒  
白首登臨仍是病仲宣愁思正漫漫

送別曹顧庵歸里

輝輝紫燄照蓬門一夕千秋得共論藝苑方期常御李  
春光無計可留髡鶯花澤國迎歸棹風雨漳南黯別魂  
他日相思何處遣新詩細讀向黃昏

送趙秋水歸里

鴻雁紛紛欲雪天那禁握手對離筵衰殘柳色難爲折

淒惻河梁各自還滿載溪山堪獨慰瘵飢詞賦悵誰憐  
明春素友應相就好向灣千共一編

探梅

歲暮風色苦庭梅寒意結我欲探其花凍指撥冰雪

王鍾岳

鍾岳字岱輿號恒石又號冰潭正定人順治間

諸生有香草亭詩一卷

王榮勸傳先王父姿性過人學問淵博爲文不  
拘一體貌魁梧美鬚髯賦詩不假思索援筆立  
就性雅而嚴接物以禮足蹟徧山川梁大司農  
蒼巖爲公甥奉命赴粵東諭尙藩請公  
同往時左右戒嚴恐蹈不測公與蒼巖飲酒唱  
和意恬如也在京師朝貴知名久困場屋竟以

諸生終

感懷

躑躅浮生夢天涯計未安身因貧作客親欲養無官湖  
海人情異干戈世路難好將松竹意耐作歲寒看

送幼平弟歸里

同來客異域今日爾先歸匹馬秦川遠孤舟滻水微三  
峯留朔氣一月送清輝愧比汀洲雁無能結伴飛

雪後同諸子夜話

賦成無處曳長裾雪掩衡門冷敝廬懷抱未投班氏管  
兵戈誰射魯連書時當暮歲心偏切愁向寒燈計轉疎

一任交游頻白眼側身天地竟何如

廣州除夕

蹉跎四十嶺南遊簫鼓誰家夜未休  
兩地懷人懸白雁一樽旨酒入青州  
春風暖動桄榔樹潮海晴吞翡翠樓  
徙倚雲天頻北望歸途迢遞不勝愁

雲中塞

北渡桑乾古定頭停鞭今作塞門遊  
嶽峯雲起晴還雨朔漠風來夏又秋  
青冢草荒秦雉堞白登臺靜漢戈矛  
何人清夜折楊柳月印平沙淚欲流

寄懷蕭靈曦山人

六朝文物接江都十載神交識酒徒  
詞賦名高梁苑雪丹青技擅輞川圖  
塵埃聚首看龍劍邱壑論心倒玉壺  
一自伊人秋水隔空憐雲樹兩模糊

哭子諒姪

家鄉遙隔恨悠悠衰草黃雲萬里愁  
如此才無服官日更何年是反魂  
秋人間零落青銅鏡天上虛傳白玉樓  
惆悵急灘癡叔在不堪回首說閩州

渾源道中

百道泉添澗水鳴空林啄木鳥丁丁  
依山茅屋人何在殘日關門避虎行



蕪園

閉門日日似禪棲  
愛坐濃陰聽鳥啼  
井上輓轡聲不斷  
兒童引水入花畦

王俞巽

俞巽字乃繹  
廣平人順治間貢生

督僕種蔬示諸兒

憶昔全盛時  
茲地盡樓閣  
凋零自我躬  
充腸惟藜藿  
祖父昔拔葵  
子孫今淡泊  
疎畦植嘉蔬  
庶以習耕鑿  
汝曹目所睹  
慎勿自菲薄

渡黃河

天上源來遠洪濤何處歸舟航如馬健草樹挾龍飛岸  
濶孤村脊雲低落日微乘風仍巨浪擊楫壯心遠

張昕

昕號暹之南皮人順治間諸生有綠肥軒詩稿  
卽席贈中孚兄弟

縱意談詩處燭花微綻紅世情憑俗合古道與君同獨  
恥文章賤相逢意氣融交游不敢問猶幸識雙鴻

過古迎溝河

莽莽寒原汗漫遊驅車偶過古迎溝中流蕭鼓空餘恨

夾岸旌旗似未收

相傳元董搏  
霄駐兵於此

衛水遙連帆影亂釣臺

高並暮雲浮空林落日啼鴉急一縷炊烟出隴頭

陳士雅

士雅字伯彥慶雲人順治間貢生

慶雲縣志士雅究心理學不以夷險易操詩宗唐人草書得旭素體

再北上

輕舟蕩漾客驚心俯仰情多酒慢斟風送天邊羣雁過  
月明水底一龍吟重遊梁苑知才淺獨對滄波念歲深  
潦倒十年何所就臨流中夜理瑤琴

趙嶠

嶠字子美高邑人順治間貢生

灑水秋寺

病骨逢秋瘦淒其况客中愁多翻厭月衣薄不禁風兀  
坐聞孤雁虛眠聽晚蛩搖搖行邁者心事與誰同

張仲

仲字永舒鉅鹿人順治間貢生

贈別王較若

偷閒方自愛閱古動奇情朝有賢人事野存高士名無  
緣休廢業獲地可深耕莫訝非年少艱難愧采榮

韓岩

岩字康海內邱人貢生

題魏石生粒園

盈盈滿院野花香  
賸有春風度畫堂  
莫道園林同粒米  
乾坤不外一奚囊

花木參差處處栽  
夕陽返照上青苔  
紫薇朝罷歸來晚  
銀燭光中細帙開

董昌齡

昌齡號竹坡磁州人諸生有野心齋小集

磁人詩公肆力於學所作古文不同凡響楷法直逼鍾王求書者無虛日不求仕進自適於山水間日與王西園劉他山彈琴賦詩又皆以行業相勵非徒作嵇阮清談也

秋日廡山晚眺

晚上海山石烟嵐徧嶺西驚霜紅葉醉歸岫白雲迷寺  
遠鐘聲近臺高人語低新涼衣漸冷拄杖過前溪

王澆

澆字若水磁州人諸生

磁人詩公頎形偉貌性高尚不樂仕進能詩工書畫鄉里奉爲祭酒與董竹坡劉他山詩酒言歡時稱

三老

飲城西駢氏園有贈

園林駢氏好種竹綠遮天鳥語虛亭外花香曲檻前新  
妝飛燕如豔曲小紅傳醉寫迴鸞紙相將入素絃

路澤農

澤農字吾徵曲周人

遊西山

削壁縣空外孤筇入斷雲  
峯垂紅樹接石亂碧流分  
哀足行多歇天風定亦聞  
幾時攜素侶終日坐秋雯

立冬日洞庭山社集看菊

三吳秋盡不知寒  
黃菊經霜尙未殘  
鄉里衣裳少新製  
草堂詩酒任交歡  
十年旅夢悲王粲  
隔代風流憶謝安  
且向花前拚一醉  
洞天福地此中寬

張光昌

光昌字元裕趙州人

讀嶼舫詩

怒焉懷大雅冥心契古人古人不可作吾道棄如塵誰  
知典型者乃在槐之澗顛絳有明德瓜瓞衍千春司馬  
盟息壤侍御批逆鱗繼此膺花封日賦考槃人爭先羣  
鳳鳴一鳳邁其倫珥貂丹陛間讜論佐維新退食亦  
懷忠孤吟夙抱伸煙雲筆下生珠璣紙上陳一洗鉛與  
華獨存精與神鮑謝及曹劉徜徉得其真雙鯉千里來  
寓我萬鎰珍長跼再三讀形隔神相親安得長側席導  
予出迷津

孫桂



桂字月恒磁州人

磁人詩月恒性長厚好行施濟鄉里稱之名山勝水多所游歷留題不少

示兒

余本堯都生隨父籍磁士素性頗爭前命不爲余主事  
事與心違踏蹬那堪覩四十始生兒六旬未爲祖預想  
再來日知無一可取有兒多務外好今不好古今人尙  
浮華古人尙推魯汝看浮華者端人棄弗數汝看推魯  
者君子悅爲伍讀書樂無窮如何力不努但願成實學  
足繩爾祖武不見我衰翁跬步中規矩耕讀守家傳兢  
兢心良苦

章漢

漢字素巖任邱人順治間貢生官武邑縣教諭  
有貯月軒詩六卷

季布

季布以勇聞義聲在一諾逃死忍爲奴留生意有託遊  
說得主翁脫禍還賜爵賢哉魯朱家斯人今不作

直不疑

不疑不盜金笑償同舍郎遲久事乃白厥名益以彰高  
賢蒙厚誣不辨固其常獨行苟無虧衆毀亦何傷

寄昌黎張長人丈

海鶴歸來臥烟霧稻梁困頓哀鴻度倦鳥知遠飛鳥飢  
丹鳳赤霄焉得訴種玉峯前憶盍簪有詩同賦酒同酣  
長人與余共事無終後以天雄教授擢靖江令沙麓暮雲遮冀北姑蘇春樹繞  
江南南北參商二十載心期如故鬚眉改雷煥新從日  
下來茂先博物猶丰采客薄林宗不共船偷欺子敬無  
留鹽滎陽老友蘇司業相見何時索酒錢

日說

日說歸休未便休三年濡滯一生羞秋風虛動張翰棹  
夜月空懸庾亮樓七葉漢貂聲自藉千金燕駿骨誰收  
賢愚窮達從來事呼我何妨任馬牛

輓貞烈桑孺人

孺人文學桑竝妻蘇守曹統六先生女儀部  
桑雨嵐先生子婦也痛夫雋才早夭以身殉

夜來讀史對殘缸  
豪氣雄心總未降  
門外忽傳奇節事  
一天冰雪入寒窗

堪憐紅槿只朝華  
黃菊含霜擬尙差  
借問冰心誰得似  
一園香雪沁梅花

遙拜姑嬋斂淚容  
兒今含笑往相從  
關心身後無他事  
三尺墳前多植松

洞庭有淚竹仍斑  
貞女峯頭魂未還  
幽夢已隨湘水去  
不須更上望夫山

劉可書

可書字長馨清苑人諸生

吳長姊

孝廉高桂妻  
甲申死難

父母去我早孤子心易危弟兄共性命兩姊賴搆持疾  
病無饑渴春秋失歲時自知遭不造不敢比他兒仲姊  
昔云歿孤墳泣路歧嚴霜摧苦草哀愴傷心脾姊于歸  
高氏良人襟抱奇曳履聲華舊結縞家室宜駸駸馳逸  
足行將躡雲遠豈期逢陽九妖氛迷帝畿紅塵馳萬馬  
盤薄郡西陲孤城經百戰一夜合長圍雞犬失鳴吠屋  
垣震鼓鼙短兵接雉堞壯士裹瘡痍姊歸與我別聲淚

雜獻欲念母志貞烈凜然冰雪姿一言許父死百勸志  
不移大節光彤史千秋稱女師吾幸託遺體庸忍玷芳  
儀誓同城存沒庶幾全而歸勗哉勤令德與子今長辭  
比我聞茲語倉皇失所期焉知此別苦但覺此言悲揮  
涕再拜謝不能措一詞姊去城遽陷魂隨白練飛潔身  
無愧忤於母有光輝諸弟年齒穉艱難復亂離笑笑空  
四顧形影黯相依回憶十年事椎心執手時蓼莪人已  
廢痛哭鵲鴒詩

邊銘珣

銘珣字潤玉任邱人諸生有東陵集二卷

憶故園

明月高懸半欲秋，碧天無際海雲收。  
角聲悲壯知寒近，爽氣橫空見火流。  
千里鄉關頻入夢，百年身世幾生愁。  
柴門松菊荒三徑，取次歸來續舊遊。

村居

平蕪春滿綠參差，客裏風光寄所思。  
一枕鄉愁千里夢，十年幽恨半生疑。  
看花莫惜高陽酒，抱膝長吟梁父詩。  
彈鋏朱門成底事，子規聲巧漫追隨。

劉獻廷

獻廷字君賢，號繼莊，大興人。

全祖望傳繼莊先世吳人以官太醫遂家順天  
 繼莊年十九復寓吳中其後居吳江者三十年  
 晚更遊楚尋復至吳垂老始北歸竟反吳卒焉  
 崑山徐尚書善下士又多藏書大江南北宿老  
 爭赴之繼莊遊其間萬隱君季野於書無所不  
 讀乃最心折於繼莊引參明史館事願隱君景  
 范黃隱君子鴻長於輿地亦引繼莊參一統志  
 事繼莊謂諸公攷古有餘而未切實用及其歸  
 也萬先生尤惜之繼莊書不甚傳近始見其廣  
 陽雜記蓋薛季宣王道甫一流繼莊之學主於  
 經世自象緯律歷以及邊塞關要財賦軍器之  
 屬旁而岐黃者流以及釋道之言無不留心深  
 惡雕蟲之技其生平自謂於聲音之道別有所  
 窺足窮造化之奧百世而不惑嘗作新韻譜其  
 悟自華嚴字母入而參之以天竺陀羅尼泰西  
 蠟頂話小西天梵書暨天方蒙古女真等音又  
 證之以遼人林益長之說而益自信其論向來  
 方輿之書大抵詳於人事而天地之故槩未有  
 問當於疆域之前別添數則先以諸方之北極  
 出地為主定簡平儀之度制為正切線表而節



氣之後先日食之分杪五星之陵犯占驗皆可  
推矣諸方七十二候各各不同如嶺南之梅十  
月已開桃李臘月已開而吳下梅開於驚蟄桃  
李開於清明相去若此之殊今世所傳七十二  
候本諸月令乃七國時中原之氣候今之中原  
已與七國之中原不合則歷差爲之今於南北  
諸方細考其氣候取其核者詳載之爲一則傳  
之後世則天地相應之變遷可以求其微矣燕  
京吳下水皆東南流故必東南風而後雨衡湘  
水北流故必北風而後雨諸方山水之向背分  
合皆當按籍而列之而風土之剛柔暨陰陽燥  
溼之徵又可次第而求矣諸方有土音又有俚  
音蓋五行氣運所宣之不同各譜之爲一則合  
之土產則諸方人民性情風俗之微皆可推而  
見矣其論水利謂西北乃二帝三王之舊都二  
千餘年未闕仰給於東南何則溝洫通而水利  
修也自劉石雲擾以訖金元千有餘年人皆草  
草偷生不暇遠慮相習成風不知水利爲何事  
故西北非無水也有水而不能用也不爲民利  
乃爲民害旱則赤地千里潦則漂沒民居無地

可瀦無道可行人固無如水何水亦無如人何  
虞學士始奮然言之郭太史始毅然行之未幾  
竟廢三百年無過而問者有聖人者出經理天  
下必自西北水利始水利與而後足食教化可  
施也西北水利莫詳於水經酈注雖時移勢易  
十猶可得其六七酈氏畧於東南人以此少之  
不知水道之當詳正在西北欲取二十一史關  
於水利農田戰守者各詳考其所以附以諸家  
之說以爲之疏以爲異日施行者之考證又言  
朱子綱目非其親筆故多迂而不切而關係甚  
重者反遺之當別作紀年一書又言聖王之治  
天下自宗法始無宗法天下不可得治宜特爲  
一書以發明之是則儒者之至言而惜其書亦  
未就近者吳江徵士沈彤獨爲繼莊立傳蓋繼  
莊僑居吳江之壽聖院最久諸沈皆從之遊及  
其子死無後卽以沈氏子爲後然其所後子今  
亦亡矣故彤所爲傳亦不甚詳乃據廣陽雜記  
出於高弟黃宗夏所輯者畧求得其讀書著書  
之概因爲撮  
拾而傳之

別裁集繼莊於天官地理農田水利形名錢穀以及兵陣刀槩之類無所不能領語其餘事也然豪氣颯馳逸情雲上讀其詩可以想見其人按別裁集載繼莊作廣陽人廣陽係古郡名今據鮪埼亭集改正

### 懷古

古之兵皆農農富兵亦強古之士皆農農朴士亦良兵農一以分甲冑無餘糧士農一以分耒耜無文章分之則兩傷合之則一理請語當途人治亂實此始

### 泛溪

白石何粼粼清流自滉滉信舟漾前溪兩岸饒蒲葦日落秋風生停橈弔山鬼

題暉草齋

誰將堂上春得比春日暉日入光更出親老無重歸誰  
將人子心得比庭前草春風日日吹草色年年好

水仙操

天行海運旋宮音萬象回薄由人心移情易性琴非琴  
刺舟而去留深林海水汨沒鳥哀吟余心悲兮無古今  
援琴而歌淚淫淫

留別張鴻伯兼懷張非文和韻

舟楫吾將老詩書世所輕誰知天下士漂泊亦無成放  
眼空今古虛懷向友生北歸心已足不復悔南征

贈行西上人

鐵騎穿雲舊拓邊  
大江歸去浪連天  
五更夢醒荒祠下  
百戰人酣繡佛前  
風急雁行排遠岫  
秋高鵬影落寒烟  
與君共望中原路  
衰草離離倍黯然

臥病

風塵泉石兩蹉跎  
歲月催人委逝波  
萬事無成心力少  
一生有幾別離多  
夢回弟妹依然失  
病久交遊誰更過  
賸把新詩消永日  
空牀獨坐強吟哦

幽居

王孫學賦小山招  
意氣峻嶒耿未消  
燕市酒酣聞擊筑

吳關人去憶吹簫功名夢醒元駒國卜築門臨白馬潮  
回首故園千里外江鄉隨地老漁樵

贈向語可

天半峨眉落照邊漢川東與蜀江連萬金散盡猶存骨  
一劍長留豈學仙秋水欣逢東海若馬蹄難遇九方歎  
窮途我自憐空手灑淚相看大別前

詠史

朝橫而夕縱志本在溫飽敝裘先自媿何論妻與嫂  
七首西人秦生死在肩隄秦政非齊桓如何欲生劫  
治國與治軍臥龍豈兩事陳壽亦何知還問司馬懿

昭君

六奇已出陳平計五餌曾聞賈誼言  
敢惜妾身歸異國漢家長策在和番

漢主曾聞殺畫師畫師何足定妍媸  
宮中多少如花女不嫁單于君不知

題閨秀雪儀畫嫦娥便面

素箋摺疊塗雲母黛筆清新畫月娥  
莫道繡奩無粉本朝朝鏡裏看雙螺

龐克慎

克慎字徽五任邱人諸生有裕德堂稿

任邱縣志克慎敦行嗜學以子壇貴封戶部郎  
 中崇禎壬午之難母曹氏殉節死慎哀籲當事  
 子祀典慎家世受尚書著尚書傳習錄及藝苑  
 歸約諸書教生徒皆有條法子壇以部郎出守  
 建寧不名一錢秉慎訓也後以不善事上官解  
 組歸慎怡然日吾不憂汝以墨敗行常恐以直  
 賈禍今知免矣

井陘過韓信談兵處

贏秦失鹿四方爭擾擾中原苦未平起沛雖提三尺劍  
 登壇誰信一軍驚淒風苦雨談兵地老樹蒼烟背水營  
 那幸左車謀未用行人千古說英名



國朝畿輔詩傳卷十七

長洲陶 梁巖薌輯 寶坻高繼珩寄泉校

魏裔魯

裔魯字竟甫號曦菴柏鄉人裔介兄順治間貢

生歷官山東鹽運使

柏鄉縣志裔魯任費縣時巨寇趙不伐等攻劫  
兗州費城高不及肩斫棗木萬餘株削令銳倒  
地其木以水灌之會冬積凍城堅如鐵環城守  
之賊騎不得入旋補江西建昌令遇呂蘇大盜  
猖獗我兵南下預造浮梁三道兵渡大江如履  
平地賊悉就擒升淮安河防同知分鎮徐州地  
勢窪下躬自督役修築長隄百里許復開渠灌  
田升四川龍安郡守郡遭張獻忠殺戮白骨徧  
野埋之東門外以邊俸移山左龍民相願  
哭擁道不能行以老乞歸卒年七十三

謁禹王廟

驅馬出城東悠悠涉涪水問君何所之言尋神禹里石  
紐已千秋村名留遺址麻柳以爲墻沙石以爲壘其中  
祀夏王儼然具冠履河洛著明德因憶巢居子我來謁  
祠下恍惚若宛委山色水聲中江流何微耳舉目眺崑  
嶽丹霞映山市日暮揚孤帆舟漏防石齒回首望廟門  
歷歷猶堪指近郭復徘徊流星疾如駛

入蜀

落落錦川去江梅夜雨飛山川多間阻戎馬正重圍隴  
月鳴羌笛巴雲捲毳衣憑鞍一灑淚壯志未全違

馬道

削嶂通烟霧攀蘿曲徑捫銀沙走石壁雪浪激雲根老  
樹垂松子寒溪長竹孫停驂郵舍晚愁絕聽啼猿

高村

翠壁圍茅屋蒼茫喧午鷄猿猱林木嘯鳥雀薜蘿栖日  
烈驚人面山高困馬蹄攀緣憑力擁俯視萬峯低

白草橋

青山兩岸合白草一溪斜驛路橋邊樹烟村嶂外家石  
梯堆積雪鐵鎖控流沙役賦多愁苦遙聞每歎嗟

龍州

萬里氏羌地西南是夜郎  
苡漿俗原異蕨麩味殊香  
山吐石門月江飛棧道霜  
兩年無吏事不厭在蠻鄉

夔門

峽連數百里日月隱重巒  
彩鷁狎驚浪輕帆下急灘  
山迴神女廟水繞武侯壇  
形勝今猶在傷心望永安

和楊子元見山堂閒居吟

投荒在絕域悵望欲何之  
強酌葡萄酒難吟白雪詩  
桐風吹幔曉柱雨落階遲  
闔苑多豪客相從曳杖藜

野馬灘

野灘無烟戶高巖結竹房  
數椽遮嶺雪一榻傍山塘  
林

密聞鷄唱天空見雁行披裘猶向火午夜聽寒螿

和張晦先韻

崑崙春色早臘盡已飛花出郭開樽酒停舟聽戍笳  
松餘積雪溪竹帶晴沙宴賞殊方劇狂歌興愈賒

登華山

咫尺天門賦壯遊遙瞻函谷拱神州足懸雷電飛丹壑  
手摘星辰控玉樓千丈虬松雲外迴三峯積雪峪中收  
黃河明滅崑崙下奔走龍沙到海流

西嶽毓靈傳往代連峯截衆鎮金天元猿夜泣千巖雨  
白雁朝飛萬壑烟坐看斗坪依嶺外臥聽瀑布響檐前

蓮花頂上仙人洞老樹凌風拂座絃

述懷

官舍蕭條冷故宮攜家今向萬山中年來詩史情偏劇  
老去江湖氣尙雄五月披裘霜露冷三春憂旱黍禾空  
荒城妻子多饑餒羌笛愁聽塞外風

回憶西安

吹落寒雲萬樹屯幾家烟火到關門青山蒼鬱連霄漢  
白水微茫繞澗村樽愛陶潛琴韻冷徑開蔣詡竹聲喧  
褰衣直躡秦川嶺欲向龍州學漆園

述懷







四庫全書提要燕川漁唱詩二卷植齋文集二  
卷傅維樞撰維樞雖生於貴族而恬退不求仕  
進早歲卽棄舉子業以詩文自娛蹟其品度當  
屬勝流然是集所錄大抵應酬之作罕逢高唱  
豈併文章視  
爲麤蹟歟

### 野老謠

出郭逢野老羸弱相提攜風塵滿行裝云從遠州歸故  
居豈不甘而樂他鄉爲貧家苦賸糧况乃遇歲饑薄田  
百餘畝舊在滹沱涯一雨三十日河流決故隄阡隴起  
洪濤耒耜安所施八口艱一餐蔽體無完衣公家徵賦  
稅人吏踵相追入室檢益桁蕭然無生資出息貸錢穀  
割愛鬻女兒所得故無多不盈吏胥谿到官無以應乃

從鞭笞之吾邑兩經亂焚掠幾無遺幸存家室者命力亦困疲匪人乘其會行劫東城陞白日淫鬼見斃人於田涸少壯率逃散吾屬將焉支攜家亡遠州舉目無依棲地主賤流氓恒爲兇暴欺近聞里中人傳誦蠲荒碑朝廷降德惠長吏篤仁慈數年散轉者歸里晤親知嗟余聞此語不禁中懷悲和淚書其事以爲司牧規

感懷

禽飛非不高魚潛非不沈狗性安所適弋網每相侵人生在天地萬事皆所任屏蹟雖絕境終遜魚與禽靜念身家累動觸文法深刑罪民無措此理嗟古今

銅雀臺

阿瞞才力雄如虎到頭卻作癡兒語  
賈履分香空爾爲西陵豈復知歌舞  
漳南尋問銅雀臺舟人北指沙成堆  
飛橋連棟今何在拍岸寒潮朝暮來

虎患息

并序

靈壽之地多山凡東西連亘者別其名曰前山  
後山蓋以慈水介其中也樵林漑泉民資其利  
近有虎羣出沒其間爲山居巨害程邑侯親詣  
山祠爲文虔禱之忽覩異獸文身銳角如古所  
稱酋耳者出搏虎而啖之自是虎暴頓息因書

其事名其篇曰虎患息云

王畿右下擁太行千峯百峯駐恒陽恒陽西鄙爲靈邑  
巖峭窈窕稱山鄉朱山房山相對峙祁林慈水羅修篁  
巨松森挺溪草茂羣虎因得穴其旁山中人畜罹斯害  
磨牙吮血心爲傷山東程侯作邑牧政本庭訓任循良  
諭知虎暴乃巨患遠詣山祠爲祈禳忽有異獸應時至  
滿身鋪錦角卓犖古稱酋耳能食虎果見搏虎如搏羊  
恣噉血肉須臾盡委骨林麓儼如霜白茲虎患爲衰止  
山氓仍得安農桑前此春旱土出蝻入夏生羽成飛蝗  
竟有細蜂來蔽野羣飛翳蝗蝗盡假出境之蝗渡河虎

大書異績史冊光中牟傳美或無二侯與先後相頡頏  
邑民感此互傳述士傳其語作頌章觀風使者采入告  
用備樂什升明堂

康熙丁丑 詔求山林隱逸之士邑大夫欲以余  
應堅辭之呈詩

聖世崇文治求才下 詔書四銓科未盡三試網猶疎  
遂枉賢侯駕來臨隱士廬百年逢曠舉知遇感非虛  
挾策應闈試才微擯有司壯行曾未遇幼學竟奚爲老  
值求賢日寧無用世思自慚庸且病不敢贅 清時

夏日集飲郊園

避俗招狂客荒亭對濁醪且容寬禮法不復整冠袍野  
色田疇遠園陰竹樹高冒炎有行旅指點羨吾曹

夢有持畫卷者屬余題詩醒忘其一二語因補成  
之

青霞片片護巖扉中有飛泉落翠微幾折板橋深柳下  
樵兒浣女一行歸

漁翁應解愛烟霞截竹編茅野作家雨後南溪春水漲  
青帆一片出桃花

胡介祉

介祉字循齋號茨村宛平人兆龍子以父蔭歷

官河南按察使有谷園詩集

毛奇齡西河詩話子兩觀酌突泉一在乙巳一在丙寅皆辨明驅驟急觀便行不能有詩後至舟中讀胡少參谷園詩集有過酌突泉詩歷下名泉稱酌突浪花奔湧雪花開何知十六年前客今日看泉恰又來爲之悵然少參爲山陰少保公哲嗣其詩盛爲當時所稱吳門汪編修卽少保門下士生平以宋詩爲宗其序少參詩曰詩莫盛於唐唐莫盛於開元天寶之際杜子美李太白王摩詰其尤學者所師承也胡子詩其能宗太白摩詰而得其正者歟則少參可知矣

明湖泛舟

明湖澄素波朱夏棹蘭槩十里藕花發幽香動欣賞山光翠欲滴面面開新爽隔浦聞漁歌悠哉起遐想

會波晚照

高天起暮寒殘陽下空谷遠塢暝烟浮邨邨返樵牧流水繞荆扉深林啼布穀老農樂年豐一犁春雨足

### 喜雨

空齋生暮寒微風下天宇殷雷何闐闐淒清夜方午古槐蒼枝鳴飄飄落疎雨把酒中心歡長嘯復起舞休哉上帝功用懋農心苦

### 望是故鄉行次原韻送毛子霞歸邨

毛生豈是鴟夷子何事吳山復楚水予長二十稱壯遊梁鴻五噫何年始晴川閣上補新圖赤壁磯前弔故壘猶憶金臺躡屐過白眼那顧公卿履此時意氣徒干霄



擊筑聲殘悲不止  
賣文賣字知者誰  
掉頭一旦辭燕市  
負卻金箱五嶽行  
高蹤到處疇能比  
余也薄宦鄂玉城  
竹裏花間期共倚  
昨來折柬新詩遲  
君不來真缺事  
忽聞衙署歸并州  
極目烟波渺何許  
欲採瑤華未得將  
盈盈相望人如咫  
我亦移官向岱東  
片帆擬掛秋風裏  
別後相思知若何  
江雲江樹愁無已  
萬壘峯陰聽雪樓  
晞髮高吟想在此

宏恩寺

疎雨乍過高天潔  
迢遙廣野塵沙絕  
一望濃陰隱梵宮  
苔蘚青蒼埋石碣  
建造乃在神宗朝  
是時大內重禪悅

黃金布地錦作衣競逐浮華忘寂滅卻笑宦寺貪且愚  
求福年年無暫歇凌霄殿宇百萬錢豈知盡係蒼生血  
可憐身死未幾何傾斜石馬圍垣缺風起空山叫鷓鴣  
白楊蕭蕭春草茁徒令過客長徘徊落日空廊響鈴玦  
草春還白遙岑暮更青幾多懷古意哀角不堪聽

涿鹿

路出樓桑里圖荒督亢亭遺風何處問匹馬此偏經凍  
萬山連不斷斷處一關通馬踏殘烟裏樵歸落照中晚

過武勝關

雲平古道霜葉舞寒風不盡天涯思征鴻點碧空

夜泊天津風雨驟作

萬籟一時息俄驚百丈巖海天腥夜氣風雨走寒潮聲  
捲帆檣亂光沈市火搖傷心是遊子歸夢隔迢迢

立秋日聞蟬

不覺輕颺至涼蟬老樹頭驚回千里夢淒斷一天秋潔  
性羞炎熱高蹤任去留最憐砧杵外思婦正凭樓

九月三日招蔣玉淵張石虹曹崐宅鄭文谿小飲

分賦

冷署蕭蕭倚碧巖一尊折柬不須緘鳥驚杖履人初到  
日落青紅嶺半銜五夜明燈催郢曲滿庭涼雨滴秋衫

相逢盡是東南彥獨愧疎狂有阮咸

喜李寅清至

一麾自駐楚江邊坐對梅花易隔年別後弟兄勞夢寐  
望中消息悵風烟空教邗水書頻寄那識稽山客又遷  
多少離懷紅燭底相逢曾不抵相憐

界牌關口占

平橋淺水路紆迴敗壁頽垣沒草萊極目荒原人影絕  
桃花爛漫爲誰開

聽歌

銀燈拂拂夜光幽管急絃繁脆欲流莫聽開元舊時調

山殘愁殺玉筍篔

李其凝

其凝字孟績高陽人爵子以父廕官戶部員外  
綠水送春帆爲正子先生題

烟花上巳滿汀洲客子乘春賦壯遊夾岸柳絲縈畫鷁  
隨流挑藥點輕鷗曠懷未歷三千島怨思先生十二樓  
返棹應圖歸計速西園芳草爲君留

成光

光字近天號仲謙大名人克輩子以父廕授工  
部員外歷官湖南糧儲道有素園詩集

大名縣志光博物洽聞與兄亮並知名順治十

四年順天鄉試司衡者競拔貴介子弟而克舉

居政府光獨刊落章皇帝召見海子深

加論勉解所御貂裘賜之曰好讀書不

失作翰林時光年十五退而作賜裘詩

以紀之康熙十六年以廕授工部都水司員外

奉命巡視河內十八年晉刑部郎中明

年出為武昌守道杜姦宄厚風俗善政不可殫

述嗣丁父憂三十三年起湖南驛鹽糧儲道湖

廣光舊遊地洞知漕政積弊立兌漕法及期行

兌民無霉溼風波之患運丁亦免近期調集之

苦時戶部尚書趙申喬撫湖南深器重焉光慈

愛好施予方正自持不惑禍福之說事多先見

守武昌時妖人朱方旦傾動一時所過督撫以

下咸謁拜如弟子光獨不為禮其徒李曉子挾

術橫鄉里官刑不能施光破其術立斃之湖南

郴州人王體旦聚眾山中不法光密使人入亂

山計誘體旦至長沙決杖死陳丹書叛光偵知

之返自茶陵嚴備以待紅苗之役大臣視師楚

黔粵三省連師會勦一切皆光督理三署按察

使一署布政使均著勞績四十六年致仕性純  
孝專親色養無間居喪哀毀逾常治家嚴肅工  
書善射間亦作畫淡遠入逸品  
精賞鑒收藏最富卒年七十五  
百家詩鈔仲謙閉門掃軌時與邵凌玉學憲吳  
星若文學飲素園草木欣榮樓臺高聳日月沐  
浴之奇烟雲變幻之態盡見之詩不但無高華  
公子之習並無斷弛名士之概其古之有道者  
與

### 眉生再入都門

維魚歡同源維鳥歡同林浮雲恣舒卷猶自戀故岑况  
是託婚媾何爲不同心昔年省重闈驅車返衛濱過君  
忽醉齋飲我桑落醇盤桓未幾時北來侍二人燕市掩  
柴扉夢想越三春君來卽言歸去住情倍辛懷哉歷夏

秋物候蕭以森朔風吹庭戶礎杵送寒禽陽月忽枉駕  
不憚軟紅塵屈指浹歲間行色各駢駢他鄉與故園乾  
坤客裏身渾忘馳驅勞翻言會晤頻疎窗有白月烏几  
有清樽相對且開顏擊筑放長吟

丁酉冬蒙

賜貂裘恭紀

翠華冉冉下 乾清城南霜滿玉鸞鳴貴戚公卿紛扈  
從忽傳飛鞚召書生被召甘泉猶色戰便許 宮前來

燕見

天顏睟穆咫尺間

天語溫仁渾不

勅肄業憑將謨典陳託婚猶荷咨諏徧對罷微聞天樂  
遙長楊羽獵起崇朝一發射熊驚漢武三驅卷旆儼周



郊重來伏謁畋遊後不待金門仙仗交黃封寶帶擎宮  
監 異賞殊恩賜紫貂我聞講武殿前密雪下解  
裘曾賚西征者數百年來此事稀功高將相無容假近  
來我父元狐冠寵榮禮數傾朝野何意推 恩及  
小臣倘示爲裘繼良冶一門挾纊抑何頻人間豪貴徒  
紛紛紈袴綺襦不足數鷓鴣鶴鷺誰能倫拜歸那敢被  
諸身只應長作笥中珍長願 垂衣億萬春

暮春夢闌招飲園中

與君幾日不相晤東風吹徧庭前樹白雪紅霞色照天  
氤氳馥郁香凝霧潦倒那知花信過韶華幾被塵緣誤

良朋歡會未易得脫帽解衣卅禮數  
淮節高捲烏几明樽槽新滴素養輕  
詠諧曼倩金門隱詞賦枚生梁苑清  
須臾落照映樓臺相攜花底重徘徊  
主人指點當階柏云是尙書親手栽  
我祖文穆知同志城隅亦有幽棲地  
雲石蒼涼舊草堂鷓鴣叫空留記君  
家兄弟何賢豪文彩歷落青雲高已  
見九賓享白璧還能一醉揮金貂  
白璧金貂去復來莫負尊前花正開  
君不見沁水園林狐兔宅平泉花木  
總塵埃人生百年草頭露低眉局促  
何爲哉

廣平申臆盟過訪賦贈

隔歲邯鄲道無繇問紫山閉關方病肺倒屣忽開顏令  
弟青雲色難兄白髮閒相期滄上水卜築共潺湲  
蚤斂垂天翼高名屬隱淪爲移忠作孝不獨句驚人倚  
劍叢臺暮悲歌燕市春南冠憑解脫莫惜染緇塵  
樽酒趁宵涼聊登伯氏堂多君全出處念我及存亡子  
敬琴先碎安仁鬢欲霜更憐分手易明日又河梁

客秋別汗朱于都門至是造訪濮陽

名流垂畫舫才致近歸君夜擁青藜杖朝揮白練裙悲  
歌辭上谷握手對南薰吾輩何搖落同淹麋鹿羣

客鄴下許典三世德堂賦贈

鹿洞鷺湖恣討論愛君名理到君門解鞍便下南州樹  
送酒還傾北海尊畫壁晚烟山入座湘簾夜月樹移痕  
獨愁孝子方鷄骨酬倡何時共鄴園

飲鄴郡李磊軒齋

一逢元禮羨登仙把臂論交豈偶然鄴下風流詞賦盛  
客中心事酒盃傳隔窗鳥語消殘暑夾徑花枝起暮烟  
舊德世傳兼嗜古尊羹滿眼任留連

滙園有懷

園在城內西北隅創自董見心先生

一徑誰開傍水湄前賢曾此樂棲遲當階樹老龍鱗合  
入室人非燕子知兒女自驚成老大兵戈猶記滿膚痕

徘徊二十年來事日落晴空雲影移

傅燮詞

燮詞字去異號繩菴靈壽人維鱗子以父蔭官

四川邛州知州有繩菴詩藁

四庫全書提要史異纂十六卷傅燮詞撰是書雜纂災祥怪異之事自上古至元悉據正史採入凡外傳雜記皆不錄分天異地異祥異人異事異術異釋異鬼異物異雜異十門

牆壕謠

三春日舒遲東疇播百穀我農貴及時過此勤難贖壯  
丁把犁鋤婦子餉饘粥忽爾一胥來手中持片牘云奉  
上官行所以安若屬邇來有鼠賊潛擾諸鄉曲百姓苦

竊劫刑曹勞捕逐吾法可永逸爾民行常速周村起高  
牆浚壕令其屬了此公家務歇汝欄中犢有司迎上心  
晝夜相催促刻期限時晷遲則加鞭朴曷敢稍羈延日  
勤浚與築那更青襟子拋書不得讀親身雜土工面手  
爲之瘵吏猶謂抗違垂首受窘辱厥工用多人大費錢  
與粟富者且力竭何況此窮獨衣物已云典子女慘將  
鬻我牆未及肩我壕未及腹幾思逃他方遺工累鄰族  
鄰族恐見累輒向吏先告可憐古人豕正當新牆麓發  
骨亂如麻拋之向原陸怨鬼白晝啼勞人深夜哭有田  
不復耘佇看豐草薜僥倖得工完壕牆旣深藪乃聞孤

竹東賊馬仍肆毒雖賞之不竊聖訓當三復

古意

吁嗟荷上珠似妾眼中淚歷亂不可收纔圓復還碎吁  
嗟荷上珠又更似君心宛轉全無定穿之空費鍼含情  
卻將荷莖折荷莖雖開絲不絕

籠鳥

籠中鳥籠中鳥爾莫自矜言語巧爾語不巧不入籠任  
爾兩翼翻長空朝棲森森之古木夜宿落落之孤松覓  
侶翔翔向南陌啼晴歷亂隨東風東風南陌日初暖百  
鳥鳴春嬌宛轉爾無布穀苦催耕亦同黃鳥聲調管今

日籠中復何樂侵曉窗前驚夢覺我欲縱爾須高飛莫  
教鷹隼相欺虐

春日偶成

東風吹柳絮日日滿雕檐草色平鋪地花香細入簾氣  
和春樹暗雨潤燕泥添獨坐空齋靜悠然適所忼

秋旅

京華相識少門外客來稀兀坐閒看帙烹茶靜掩扉高  
風殘葉落斜日亂鴉飛作客天涯久思歸未得歸

秋柳和馬雁楚姊文韻

萬樹參差柳淒淒邨塢邊溪寒浮敗葉霜冷散孤烟斜



日聞樵斧西風繫客船可憐秋色老搖落又今年

喜王天與來

抗手怱怱歲月催東南凝望動疑猜風波世上知誰好  
戎馬叢中訝汝來祖逖先鞭慙偶著陳蕃一榻喜重開  
故人相對天涯裏無限情悰付酒杯

江南冀北愴離羣惆悵臨風獨憶君攬鏡每憐非故我  
挑燈還喜得新聞年來尺素疎秋雁時有長歌發暮雲  
握手相思差可慰舊遊重說意殷殷

自石邑之蒲吾

高峯四合插天齊石邑西來路轉迷鳥道半隨山曲折

人家多在澗東西依牆種樹遮茅屋壘石爲橋接斷溪  
幽境日能消溽暑長吟緩步一攀躋

秋日山中

仲秋風日爽遐勝北山阿逕逐清溪轉雲從別嶂過草  
深麋鹿蹟松隱鷺鷥窠風急悲鴻雁天寒去薜蘿鐘聲  
敲遠寺樵唱下平坡僻路行人少荒邨吠犬多黃華舒  
野圃紅葉脫高柯境靜心閒寂疎狂託短歌

晚眺

西山望裏日初斜萬縷同雲映作霞影入清溪流不去  
一泓春浪湧桃花

山中絕句

水澄山靜畫圖新  
雲樹微茫看不真  
野老杖藜吾策蹇  
相逢俱是畫中人

文山突兀接晴空  
俯瞰羣山培塿同  
昨日市城西望處  
此峯正是夕陽中

途中口占

一路雲深老樹齊  
梵宮已隔數峯西  
滿天風雨催秋老  
巢落空山送馬蹄

王澤洪

澤洪字郁雨  
曲周人  
官江西饒州府知府

曲周縣志澤洪以官貢授泉州倅歷饒州守甲寅初逆氛告急廣信已應賊饒大震方儲糧清野為城守計而參將程鳳者陰與賊合勒兵反被執脅以及不屈乃擁之行至弋陽橋乘間躍水中民船救之獲不死問關赴省從幕府討賊轉運糧儲力勸軍務未幾復饒州仍知府事以積勞卒

賊程鳳據城叛余投水獲免九死一生從幕府贊

畫克復饒郡悲慨交集感而有作

鼓角驚魂定生歸亦偶然妖雲消白晝止水憶寒泉  
 氣荒城暮歡聲藜杖傳慇懃諸父老瀕死幾人全

陳 襄

襄字若水號思菴文安人協兄官福建知府有

有容堂詩

故友

上林雖有樹不若故鄉蘭  
新知雖云樂不若故人歡  
聞子足至門當饋未及餐  
握手語千古寧問寒與暄  
揮手若風雨未竟復更端  
語多或錯亂亦自出肺肝  
秉燭兩相顧且笑且復歎  
及汝同壯時鬢髮忽已殘  
丈夫逾中歲始知世事難  
汝猶蚤雄飛吾仕久曠官  
生平獨往意耿耿未能安  
王貢豈不偉要非我所觀  
人生許與分豈在綬與冠  
取筑爲子擊取琴爲子彈  
一歌先齊風大海揚波瀾

別日常苦促會日常苦遲昔無旬日隔今當幾歲時豈  
日無他人念子意不移相須旣車輔相和亦填箎中誠  
無內外肉骨豈參差舍我道路傍悠悠中心悲願君惟  
古人以慰長渴饑

羈旅

羈旅頻驚節黃花對面生嚴霜吹短袂涼月上孤檠避  
俗常稱懶逢人畏說名漁舟時近遠唱和有餘清

夜泊

夜靜羣紛息舟虛繫岸斜更殘嚴戍鼓露冷聽悲笳看  
劍情偏切開樽興有涯漁燈明滅後潑墨點棲鴉

杜恭俊

恭俊字承三寶坻人立德子官江西廣信府知

府

贊坻縣志恭俊以廕補工刑兩部司曹綜核詳  
審具有條理以憂歸康熙庚辰迎駕三

河  
上詢知故相子甚喜並問立德葬處  
御書永言惟舊四字賜之補刑部督捕  
郎勘逃緝諸案多所保全出知江西廣信府未  
幾卒恭俊內行完備推財讓產尤能濟人緩急  
有某姓逋官賦三百金將鬻其女恭俊捐金  
代償為女擇良家子配之其盛德類如此

訪王叔萃

王子讀書處悠然塵外尋入門惟見柳到戶即聞琴翠

竹分秋徑繁花雜暮林幽棲雲水蹟開卷聖賢心草閣

揚雄賦茅亭謝朓吟曲肱登孔席懷寶任原襟雅趣追  
先哲英才羅近琛烏情隨俯仰鷗志肆浮沉論別將經  
歲相思直至今乾坤吾道契風雨故人音拂塵山光納  
飛觴海氣侵應知談笑意不讓大河深

張澗

澗字汝漸一字大勗磁州人候選州同知有純  
白齋詩一卷

苦雨

杜門三日雨連綿平地驚翻萬斛泉人苦道淤泥沒脛  
河因水汎浪齊肩曾聞有術鞭陽石更倩何人補漏天



安得憑高舒遠望懷裏應不異堯年

燈下對盆梅偶興

漏鼓聲中月半輪因花不寐自吟呻寒燈照豔三更雪  
紙帳留香一室春玉骨珊珊同鶴瘦冰魂濯濯並詩新  
小奚顧我閒評笑冷態酸風勝寫真

李士劭

士劭高邑人歷官江蘇淮海兵備道

徐神翁唐德宗時人得長生術至宋高宗爲康王  
時神翁與之遊贈詩曰牡蠣灘頭一艇橫夕陽  
西下待潮生與君不負登臨約同上金鼈背上

行殊未悟其旨後南渡航海日方夕潮淺舟閣  
於灘問之曰牡蠣灘也因起步山上問何山曰  
金鰲山高宗恍然憶神翁詩語及諦視石壁有  
神翁題詩在焉墨蹟尙溼

聞有徐神翁成仙已出世蓬萊可逍遙天地共睨胡  
爲游帝王猶作登臨謎灘淺膠海舟潮生待牡蠣金鰲  
石壁間始悟言非僞莫挽避敵行前知亦何濟

魏裔京

裔京柏鄉人裔介弟順治間貢生有致遠堂詩

古槐河

迢遞長河野色侵平沙古渡夕陽陰蘆汀驚雁排雲唳  
花塢寒蟬倚樹吟雨蹴漣漪成錦繡風翻楊柳正蕭森  
可憐梁晉兵爭地只有槐波自古今

魏 勣

勣字亮采號蒼霞柏鄉人裔介子以父廕補刑  
部員外歷官陝西臨洮道有玉樹軒詩草

柏鄉縣志勣本平原太守裔懋子裔介三十未  
育子繼焉出守建昌一以寬和爲務時有裁兵  
之議營將奉行過急一軍皆譁勣單騎諭定之  
補荊州荆爲駐防要地糧餉歲四十餘萬主者  
多侵漁或給不以時兵常有噪者勣請建倉  
厥百五十區歲收運納屏絕侵蝕兵伍便之  
詹明章序庚寅柏鄉魏公來漳郡未數月政治  
民和德化沾被屢集多士而誘掖勸勉之以正

學術以勵風

俗意宏遠矣

喜彭士報自豫至燕

跋涉何辭遠中原匹馬來黃金燕市客白雪孝王臺笛  
裝關山老年光日月催華堂秋色靜試共盡餘杯

夏日閉戶滙景園雨中卽事

雨過軒窗潤頰襟頓爾除雲沈迷野鶴池滿響遊魚嫩  
竹依山翠高槐映壁疎僻居門巷靜高臥讀殘書

蘆溝道上

風烟萬里接神京此地由來古北平橋上霜華飛落木  
河邊柳色擁行旌人家夜雨廬龍塞牧馬秋風涿鹿營

寄語二三同學者五陵佳氣日縱橫

### 王涵墳

涵煩字漢球曲周人官陝西榆林府神木同知

### 有然鬚吟

曲周縣志涵煩喜哦詩工書爲諸生時言經濟輒鑿鑿以成貢知西安縣歲歉具揭爲民請命一抒積逋之累歷金華延安同知皆有聲初知西安時有縣役殺其兄誣人者廉得其狀寘之法之任金華西安民爭遮道留金大姓有以析產訟者納賂叱去之

### 秋雨河溢

空謂河渠賈讓書望洋潑倒意何居  
竭來秋爽宜清夢未必愁思付太虛  
龍伯有懷饒自歎馮夷多事更誰如

請君試覓南華解蛙井中央慮亦疎

### 傅燮雖

燮雖字鸞來號笠亭靈壽人維鱗子貢生有笠

### 亭詩集

陸隴其序鸞來感懷詩百首磊落纏綿有古人風當歌之清廟勒之藝器

### 春日感懷

悔違世俗率天真始信今非上古民日計難將詩乞米  
途窮何用酒澆春爾生曠達空懷刺孫子蕭條久負薪  
客聚平原多肉眼誰曾物色賣漿人

日坐桃源列畫圖酒酣耳熱唱鳴鳴名山書有三千卷

別業桑無八百株說劍鄉人多指點談詩夜鬼任胡盧  
窮愁不著潛夫論慚愧徒生七尺軀

誰謂貂蟬勝鷺蓑生涯澹蕩計如何寢邱地在躬耕好  
祕閣書留手校多白水歌殘長夜晦青山句老醉顏酡  
犧牛枉自披文錦可似窮簷養太和

### 高緝睿

緝睿字堯臣號鏡庭恒懋子靜海人廕生官福  
建布政使有崇古堂詩鏡山閣偶存

天津府志堯臣詩古文詞不作常語官輦下知  
時多無賴置其渠于法都城肅然貧民某欲鬻  
其妻誣以奸鞠得  
實杖之賜以錢布

朱葵尊高博士恒懋席上留贈公子緝睿詩列  
席先投轄升堂喜蓋簪飄零忘薊北風物盡江  
南滄酒資製清漿梨白露甘留連如意舞更與  
阿戎談西陸清秋候東山舊宅門卷一盡卷一日夕  
文詠許追陪且為看花起卷一還秋卷一了  
馬回春風倚歸櫂賭墅定重來

### 憶故鄉

去歲渾如昨居諸旅夢間雁行愁落日馬首戀家山時  
易春將半花開客未還故園歸去好明月滿秦關

### 鏡江舟中

上灘宜散步倚岸數游魚小圃花容折僧房壁許書青  
帘村市酒修竹野人居牧笛來何處騎牛涉碧渠  
千里俱蕭索村鷄喜乍鳴桑麻粗種植廬舍小經營分



水羣安礎修渠各聚泓我州凋敝甚孤堞枕江聲

留別杜近公

不必傷遲暮聲名亦絕塵風流逸少匹才調馬卿倫龍  
劍光難閤蛾眉妒始眞堅心戢毛羽鵬鷲自嶙峋

憶浣園梅花

疎牕殘雪夜悠悠小苑梅花憶舊遊短笛幾人吹塞曲  
停杯有客動鄉愁寒烟淡鎖光凝戶斜月低垂香滿樓  
近日關河無驛使一枝誰寄慰淹留

戎州感興

南溪舊俗尙豪雄畫棟雕梁映碧空一自點蒼傳煠火

獨留涪水耐春風  
夔龍事業荒烟裏  
螺黛峯巒冷雨中  
惟有合江樓上月  
清輝還與昔年同